

Акафист преподобным Зосиме, Савватию и Герману, Соловецким чудотворцам

Память празднуем 21 (8) августа

Кондак 1

Избраннии угодницы Господни и велицыи чудотворцы, светильницы Христовы Церкви пресветлии, облиставшии благочестия светлостьми пустыни Севернаго Помория, и всей стране Российстей сияющий выну чудес множеством, преподобнии отцы наши Зосимо, Савватие и Германе, яко имущии дерзновение ко Господу, благоприятными своими к Тому мольбами от всяких нас бед и зол сохраняйте, да радующеся зовем вам:

Радуйтеся, преподобнии отцы наши Зосимо, Савватие и Германе.

Икос 1

Ангели воистину явистесе земнии и человецы небеснии житием вашим, преблаженнии отцы наши Зосимо, Савватие и Германе: во плоти бо, яко безплотнии, ангельское совершите жительство на земли, вся красоты мира и наслаждения временная яко уметы вменяюще, чистотою же и пощением выну к Богу приближающеся. Емуже ныне достойно со безплотными предстояще, примите от любве нашея приносимая вам хваления сицевая:

Радуйтеся, единого Бога от всея души своей возлюбившии; радуйтеся, от юности Тому преподобием и правдою послужившии. Радуйтеся,

возненавидевшии мира сего тленные красоты; радуйтесь, избежавшии мудре житейских соблазнов и суеты. Радуйтесь, к деланию заповедей Господних всею любовью прилепившиися; радуйтесь, мира сего и всякаго пристрастия к оному удалившиися. Радуйтесь, иноческое житие богоугождения ради себе предизбравшии; радуйтесь, тесный и прискорбный путь всею душою возлюбившии. Радуйтесь, мудрии взыскателие Христа, бисера вожделеннаго и драгаго; радуйтесь, люботруднии носителие Христова бремене, легкаго и благаго. Радуйтесь, Ангелом безплотным во плоти брэнней подражавшии; радуйтесь, на земли жительство небесное нам показавшии.

Радуйтесь, преподобнии отцы наши Зосимо, Савватие и Германе.

Кондак 2

Видя себе, святе Савватие, ради многих своих добродетельных исправлений, всюду в сопребываниих иноческих почитаема и ублажаема, и бегая суетныя мира сего славы, взыскуя же вечнаго воздаяния на небесех, устремился еси ко отоку Соловецкому, да тамо втайне и никимже видимый поработаеши невидимому и вся видящему Богу. Темже и улучив желаемое, блаженным Германом к сему наставляем, радостно возопил еси Богу: Аллилуия.

Икос 2

Разум неуклонно вперив от утробы матери к Богу, и горняя выну мудрствуя и взыскуя, дольних же всецело отвергался, богомудре Зосимо, поревновал еси житию преподобнаго Савватия, и во отце пусте, идеже сей богоугодне соверши подвиги своя, вселился еси, да с ним наследуеши жителство горняго Иерусалима. Темже во обоих восхваляюще пустынножития рачительство, зовем вам:

Радуйтесь, любви ради Христовы, любовь в себе к миру поправшии; радуйтесь, всякую греховную сладость века сего презревшии. Радуйтесь, подобници Аврааму не точию верою и упованием, но и добровольным от рода своего и дома отеческаго преселением; радуйтесь, пустыни всекрасная и благозлачная насаждения. Радуйтесь, безмолвия тщаливейшии рачителие; радуйтесь, трудных подвигов пустынных искрении любителие. Радуйтесь, в дебрех и горах паче, неже в селех мира, изволившии приметатися; радуйтесь, в пустынях непроходимых, едни во трудех и соблюдении заповедей Господних возлюбившии подвизатися. Радуйтесь, яко злато, искусившиися в горниле пустыннаго озлобления; радуйтесь, доблественне претерпевшии от бесов же и от людей многая искушения. Радуйтесь, пророку Божию Илии и Крестителю Господню Иоанну нравом пустыннолюбия подражателие; радуйтесь, доблему Герману единомысленнии сподвижници и любобезмолвнии купножителие.

Радуйтесь, преподобнии отцы наши Зосимо, Савватие и Германе.

Кондак 3

Силы небесныя, в служение посылаемыя хотящим наследовати спасение, дивно послужиша вам, о двоице боголюбивая. Егда бо насельницы мирстии, стужающе безмолвию твоему, отче Савватие, жити хотяху во острове близ тебе с женами и чады, Ангели грозным прещением и наказанием жены рыбаревы воспятиша сих от начинания богопротивнаго; тебе же, отче Зосимо, во озимении пребывавшему кроме брашна, ангельским служением преподашася потребная ко препитанию. Сего ради Богу, спасающему угодники Своя, поим: Аллилуия.

Икос 3

Имуще оток морской во обителище себе, никимже населяемый, и в нем пребывающе, аки в рай богозданнем, вне мятежей и волнений житейских, и, кроме суетных попечений, благочестно и богоугодно подвизастесь, о богоблаженнии, во дни и нощи поучающесь в законе Господни, и на всякий час умом несмущенным и сердцем чистым возносяще усердныя к Богу молитвы и моления. Сего ради радостию вопием вам:

Радуйтесь, в законе Господни непорочно ходити всегда восхотевшии; радуйтесь, Господа своего пред очима своима присно имевшии. Радуйтесь, страхом Господним вся пути своя ограждавшии; радуйтесь, в трезвении умнем все житие свое провождавшии.

Радуйтесь, вся помыслы ума в послушание Христово всецело пленившии; радуйтесь, чистыя ваша сердца в жилище Святому Духу представившии. Радуйтесь, не давшии сна очима во всенощных Господеви предстоящих; радуйтесь, выну претерпевшии скорби в поучении смертном и в сердечных ко Господу воздыханиях. Радуйтесь, с искреннею любовью подвизавшиися на славословие Божие и псалмопения; радуйтесь, сердцем и усты непрестанныя возсылавшии к Богу моления. Радуйтесь, внутрь сердца своего сокровенное царствие Божие обретшии; радуйтесь, восхождению умными к небесным видением востекшии.

Радуйтесь, преподобнии отцы наши Зосимо, Савватие и Германе.

Кондак 4

Бурю жития сего многомятежнаго безбедно преминусте, отцы преподобнии, и свирепыя волны страстей же и искушений, от мира и плоти и от духов злобы воздвигаемая, не погрузиша и не поколебаша корабля душ ваших, ветрилы молитвы непрестанныя окривляемаго, и нестяжанием облегчаваемаго, благодатию же Божиею управляемаго. Темже и достигосте к безмятежному пристанищу живота вечнаго, вопиюще Богу: Аллилуия.

Икос 4

Слышаще и ведуще от писаний Божественных, яко вси подвизавшиися во благочестии распинаху плоть со страстьми и похотьми, благочестномудренно, о

преподобнии, сих подвигом последствующе, подвижастеся умертвити уды своя сущия на земли, в пощениих, бдениих и во всяких трудах иноческаго жития мужески претерпевающе скорби. Сего ради, яко добрия подвижники благочестия, венчаем вы хвалении сицевыми:

Радуйтесь, телеса своя труды и болезнями воздержания увядившии; радуйтесь, вся плотская мудрования, на дух воюющая, духу покорившии. Радуйтесь, покаянными слезами пламень страстей угасившии; радуйтесь, в печи воздержания души своя яко злато очистившии. Радуйтесь, ветхаго человека со страстьми его совлекшиися; радуйтесь, одеждою безстрастия и славою нетления достойно облекшиися. Радуйтесь, возненавидевшии временную греха сладость; радуйтесь, наследовавшии на небеси нескончаемую радость. Радуйтесь, прежде смерти, миру и сластем его плоть свою распеншии; радуйтесь, прежде воскресения, славу будущия жизни в себе проявившии. Радуйтесь, стезею поста к наследию райа, потеряннаго невоздержанием, путь нам указавшии; радуйтесь, в телеси мертвеннем и тленнем безсмертие и нетление будущаго века всем предъявившии.

Радуйтесь, преподобнии отцы наши Зосимо, Савватие и Германе.

Кондак 5

Боготечныя и многосветлыя звезды явились есте, преподобнии отцы Зосимо, Савватие и Германе, светозарными исправлении заповедей Господних

озаряющей души и сердца верных, и преплывающим в ноши греховнаго омрачения пучину житейскаго моря указующий благонадежный путь ко блаженному пристанищу небеснаго царствия. Темже явившему вы, яко руководители и наставники ко спасению, благодетелю Богу поим: Аллилуия.

Икос 5

Видевше злокозненнии ненавистницы спасения человеческого, нечистии души тьмы, богоугодное житие ваше, отцы преблаженнии, многообразная воздвигаху на вы искушения и страхования, овогда в мысли и сердце всеваяще боязнь и смущение, овогда же преобразуящися в различная привидения дивиих зверей и гад, с яростию устремляхуся на вы, чающе отвратити от подвига богоугоднаго и изгнати от пребывания пустыннаго; вы же, твердою верою в Бога Промыслителя возмогающе и оружием молитвы и воздержания противу врагов ваших ополчающися, до конца победисте и низложисте их державу. Сего ради, победительную песнь поюще, взываем к вам:

Радуйтеся, воины духовнии непобедимии; радуйтеся, оружницы Христовы добропобеднии. Радуйтеся, подвижницы, противу козней лукаваго мужески ополчившиися; радуйтеся, столпи крепцыи, от нападений вражиих не поколебавшиися. Радуйтеся, вся стрелы диаволи аки хвратие сокрушившии; радуйтеся, вся стужения того и страхования ни во чтоже вменившии. Радуйтеся, яко, во плоти суще, победисте враги безплотныя и невидимыя; радуйтеся, яко и во гробех лежаще,

низлагаете вражия ополчения. Радуйтесь, победоносцы славнии, венчаннии от Небеснаго Венцедателя; радуйтесь, споборницы доблии ратующим на миродержителя тьмы века сего. Радуйтесь, яко подвигом вашим Ангели удивишася; радуйтесь, яко о славе вашей собори верных возвеселишася.

Радуйтесь, преподобнии отцы наши Зосимо, Савватие и Германе.

Кондак 6

Проповеданное от Ангел изволение Божие о населении иночествующими отока Соловецкаго исполнися вами, отцы преблаженнии Зосимо, Савватие и Германе; се бо пустыня неплодная и ненаселенная, поты же и слезами вашими обильно напоенная, показася яко вертоград благоцветущий и рай словесный, идеже лица иночестии, вами благонаученнии, плоды богоугодныя приносяще, поют ангельскую Богу песнь: Аллилуия.

Икос 6

Возсиясте, отцы богоноснии, светом благочестия, яко светила богосветлая, светоносными лучами ваших подвигов и добродетелей просвещающий всюду. Отонудуже мы, грешнии и тьмою страстей помраченнии, во свете ваших богоугодных деяний текуще ко дню света и спасения, восхваляем вы, поюще сице:

Радуйтесь, ученицы Христови благопослушнии; радуйтесь, Владыки своего раби блазии и вернии.

Радуйтесь, трудолюбнейшии винограда Христова делателие; радуйтесь, тщаливейшии заповедей Христовых исполнителие. Радуйтесь, игу Христова смирения и кротости благопокорне рамо свое подклонившии; радуйтесь, во след Христа Господа, учившаго о нищете, усердно в нищете и нестяжании последовавшии. Радуйтесь, по словеси Господа, прешедшии путь временнаго жития сего стезями прискорбными и тесными; радуйтесь, аки дождем, измывшии души своя токи слезными. Радуйтесь, Краснейшему душ Жениху красоту девства своего сохранившии; радуйтесь, во всякой святыни, всеми добрыми делы Тому благоугодившии. Радуйтесь, Господа своего прославившии в душах ваших и телесех; радуйтесь, от Господа по достоянию прославлению на земли и на небесех.

Радуйтесь, преподобнии отцы наши Зосимо, Савватие и Германе.

Кондак 7

Хотяй спасти вами многая, премилосердый Бог яви вас быти не точию наставники сонма иночествующих, но якоже боговещанныя проповедники, возвестившия имя Божие в странах Лапландии. Людие бо, во оных местех обитающии, и не ведевшии дотолу Бога, но прилежавшии весьма идолопоклонению и нечестию, во светлости вашего, о преподобнии, жития, знамений же и чудес, узреша первую зарю спасительнаго боговедения и благочестия, и от вас научишася воспевати Истинному Богу: Аллилуия.

Икос 7

Дивно и преславно совершивше путь своего спасения, чудную же и боголепную основавше обитель во спасение иночествующим, блаженную восприясте живота своего кончину, приснопамятнии отцы наши, Зосимо, Савватие и Германе; обаче, и по смерти вашей, присно живи суще, нас чад своих, никогдаже оставляете, не духом точию нам присно спребывающе, но и мощи своя цельбоносныя нам предавше, яко сокровище безценное. Сего ради с радостию ублажаем вы, зовуще:

Радуйтесь, добрым подвигом во всем житии своем подвизавшиися; радуйтесь, славою и честью от Владыки своего Христа увенчавшиися. Радуйтесь, яко, привременно потрудившися, в вечный покой внидосте; радуйтесь, яко, тесным шествовавше путем, к блаженству царства небеснаго достигосте. Радуйтесь, аще и не единокупно, но в равных подвигах подвизавшийся на земли; радуйтесь, за равноподвижное житие, радостию и веселием вкупе наслаждающиися на небеси. Радуйтесь, во отце пусте, яко град, обитель иноком основавшии; радуйтесь, сонмы иноков о Христе Бозе во оней собравшии. Радуйтесь, стражи стаду своему приснободреннии, и по днех временныя жизни от дел благотворении не почивающии; радуйтесь, сынове царствия, на небесех живуции и земных не оставляющии. Радуйтесь, духом вашим горе со Ангелы святыми, и долу с нами грешными присно

пребывающих; радуйтесь, от честных мощей ваших струи милости на всех источающих.

Радуйтесь, преподобнии отцы наши Зосимо, Савватие и Германе.

Кондак 8

Странную и пречудную, велию же и прекрасную узрев на воздусе явльшуюся церковь, все же место оно, на немже имяше возградитися обитель иноков, видя неизреченным светом осияваемо, ужасом исполнился еси, отче Зосимо, от предивнаго видения. Обаче, Божие в оном откровение поразумев, на созидание обители тебе поощряющее, купно же грядущую славу места сего прозря, умиленным сердцем и усты воспел еси Богу: Аллилуия.

Икос 8

Вси правовернии россиистии людие, прославляюще ваше святое и равноангельное житие, во всяких нуждах и скорбех притекают к вашей помощи и заступлению, отцы досточуднии: дана бо есть вам от Бога; благодать, еже молитися за ны, избавляти же и спасати от всяких бед и зол притекающих к ракам честных мощей ваших, и на всяком месте призывающих святое ваше имя. Темже, исповедающе чудная ваша благодеяния, благодарственная восписуем вам, зовуще:

Радуйтесь, источники Божественных дарований неизчерпаемии; радуйтесь, милования и любви к людем сосуди неизживаемии. Радуйтесь, яко кадило благовонное, о мире молитвы к Богу возносящими;

радуйтесь, немолчными вашими ходатайствы всякое благословение от десницы Божия на ны низводящий. Радуйтесь, сущим в скорбех и нуждах известнии помощницы; радуйтесь, в обстояниях и напастех скории пособницы. Радуйтесь, в недугех целители, и в бури страждущим благонадежнии кормчии и избавители; радуйтесь, во всяких бедах и искушениях теплии предстатели и утешители. Радуйтесь, верным, благочестно чтущим вас, на сопротивныя споборницы; радуйтесь, всея земли Российския избраннии молебницы и заступницы. Радуйтесь, на земли и на мори чудеса преславная содевающий; радуйтесь, во вся концы призывающим вы скорую помощь независтно простирающий.

Радуйтесь, преподобнии отцы наши Зосимо, Савватие и Германе.

Кондак 9

Всеми Богокрасными лепотами добродетелей украсив себе, прехвальне Зосимо, наипаче явился еси краснейший душею же и телом, достойно помазався священства Божественною мастию. Темже, егда во святем храме совершал еси пред престолом Господним первую Божественную службу, видеша вси лице твое, облистанное светом благодати, яко лице Ангелово; весь же храм, во известное свидетельство достоинства твоего, исполнися велия благоухания. Сего ради вси, благодарите Бога о своем пастыре, радостным сердцем взываху: Аллилуия.

Икос 9

Ветийственными добровещаньми несть возможно по достоянию воспети и прославити многая и неисчетная, велия же и преславная, и всякое разумение земное превосходящая, совершаемая вами, отцы преподобнии, на всякое время чудотворения. Обаче, да не явимся чрез немотствование подобни рабу, сокрывшему сокровище своего владыки, от уст, аще и не обученных и слова премудрости отнюд не имущих, любовь же точию и благодарением движимых, дерзаем простирати песнь благодарения в память и прославление чудес ваших, зовуще сице:

Радуйтесь, чудотворцы великоименитии и благославнии; радуйтесь, душ и телес врачеве немздоприемнии. Радуйтесь, очеса слепых благодатию Божиею просвещающии; радуйтесь, немотою связанный уста ко благоглаголанию разрешающии. Радуйтесь, расслабленных удесы исправляющии неможение; радуйтесь, хромым дарующии правохождение. Радуйтесь, плененных предстательством своим от уз и пленения свободяющии; радуйтесь, мертвых силою Божиею, вашим же умолением воскрешающии. Радуйтесь, от обладания и мучительства бесовскаго одержимым подающии свободение; радуйтесь, во всяких страстех и недузех совершающии дивное поможение и исцеление.

Радуйтесь, преподобнии отцы наши Зосимо, Савватие и Германе.

Кондак 10

Спасения подвиг добре совершив, жития же сего временнаго отрешаяся и отходя к животу вечному и блаженному, Зосимо богоблаженне, утешал еси ученики твоя, глаголя, яко, разлучаяся с ними телесне, не отступен будеши от них и обители твоей твоим духом. Отонудуже и самими делы слово твое исполняяй являешися, не точию невидимо соприсутствуя нам и назирая вся, но и видимо многожды, вкупе со блаженным Савватием, являешися во время благопотребно призывающим вас в помощь и вопиющим Богу: Аллилуия.

Икос 10

Стена неборимая и покров твердый, спасения забрало и оружие победы быша нам, отцы преподобнии, теплая ваша к Богу молитвы, в день брани оныя лютыя, егда, по грехом и беззаконием нашим, врази крепцыи и бранноискуснии со огнем и мечем нападоша на ны в достоянии вашем, во еже сокрушити святыни ваша и положити я в разорение и попрание, духовная же чада ваша победити и погубити смертию безгодною; обаче, никоеже зло возмогше сотворите, сами наипаче тии исполнишася студа и безчестия, уповаущии же на помощь вашу препоясашася радостью и веселием о своем спасении. Благодаряще убо о сем Бога, исповедуем купно ваше ходатайство и заступление, и вопием вам тепле из глубины души:

Радуйтеся, пастырие добрии, от врагов губительных стадо свое защищающии; радуйтеся, яко орли под

крилома своима птенцы своя покрывающии. Радуйтесь, покровом молитв своих в день брани нас осенившии; радуйтесь, гнев Божий, праведно на ны движимый, ходатайством своим утолившии. Радуйтесь, не давшии своего достояния в поправление и расхищение; радуйтесь, паче надежды сохранившии е от огненнаго запаления. Радуйтесь, уповающия на вы от губительства смертнаго свободившии; радуйтесь, от раны и язвы, от уз и пленения дивно тех сохранившии. Радуйтесь, врагов гордыню и дерзновение обратившии в студ им и безчестие; радуйтесь, ны жительствующия в обители вашей, неискусобранныя и безоружныя, одеявшии в радость и веселие. Радуйтесь, веры и благочестия отеческаго неусыпнии охранители. Радуйтесь, за царя и отечество явльшиися и по смерти мужественнии воители.

Радуйтесь, преподобнии отцы наши Зосимо, Савватие и Германе.

Кондак 11

Песни хвалебныя и моления всеумиленная приносяще, долготу же путную и опасности моря ни во чтоже вменяюще, притекают к цельбоносным мощем вашим царие и князи, святители и вельможи, богатии и убозии, ближнии и дальнии, всяк возраст и пол, и всякое верных совокупление, и яко от неистощимаго источника, по коегождо своей потребе, приемлюще обильная врачевания душевная же и телесная, прославляют и величают Бога, таковую благодать вам даровавшаго, поюще: Аллилуия.

Икос 11

Светом Божественных благодати, в недрах земли, в предивных знамениях и чудесах, от первых дней упокоения, возблиставших ваша мощи, достодолжно и праведно лица иночестии, от многолетнего покровения изнесше, поставиша со благоговением на свещнице церковнем, во храме, имени вашему созданием, благочестием великаго и святаго подражателя ваших подвигов, исповедника и мученика, святителя и первопрестольника Российскаго Филиппа. И мы ныне, благочестно о славе вашей веселящися, обстояще честныя раки мощей ваших и любезно тыя обლობызающе, велегласно зовем вам:

Радуйтесь, светильницы пресветлии, на свещнице церковнем преславно поставленнии; радуйтесь, кивоти честнии, не камением и златом, но благодати дарованьми украшеннии. Радуйтесь, яко три звезды, озаряющии тьму полунощную; радуйтесь, яко три столпа, в пределах Севернаго Помория утверждающии веру православную. Радуйтесь, источницы райстии, моря чудес изливающии; радуйтесь, бисерие дражайшии, Церковь Христову украшающии. Радуйтесь, благочестия и добродетели светлейшая зерцала; радуйтесь, Церкви и отечества неборимая забрала. Радуйтесь, райскаго исполнения крини благовоннейшии; радуйтесь, лозы Божественныя розги благоплоднейшия. Радуйтесь, отцы всеблаженнии, прославляемии горе от Бога и Ангел, и долу ублажаемии от человек; радуйтесь, яко

радость ваша, святая и совершенная, пребывает во век.

Радуйтесь, преподобнии отцы наши Зосимо, Савватие и Германе.

Кондак 12

Благодать свою Божественную, в телесех ваших обитающую, яви иногда Преплагий Бог благоговейному иноку Иосифу во образе двух столпов огнезрачных, от земли до небес над гробы вашими возносящихся и сияющих светом неизреченным: воистину бо вы есте, отцы преподобнии, духовнии светозарнии столпи, светлостию высоких добродетелей и светом богознания, знамений же и чудес озарившии пресветло духовную тьму в странах полунощных. Сего ради Богу, прославляющему святая Своя, поим: Аллилуия.

Икос 12

Поюще в песнях подвиги и труды вашего богоугоднаго жития, преславная же содеяная и содеваемая во всяком роде благотворения и чудотворения восхваляюще и прославляюще, недоумеем, отцы досточуднии, како вас по долгу возименуем: многая бо суть ваша добродетели и дарования, сего ради многая приличествуют вам и именованя. Обаче, во многих малыми удовлетворяюще, сия вам с любовью восписуем:

Радуйтесь, ангели земнии, яко ангельским жительством на земли пожисте; радуйтесь, человецы небеснии, яко, земнородни суще, возненавидесте

земная, небесная же возлюбисте. Радуйтесь, постницы терпеливейшии, в приснем пощении все житие свое проводившии; радуйтесь, пустынницы достохвальнии, в пустынях незаходимых Господеви послужившии. Радуйтесь, учителя и наставницы, руководящи своими делы на пути спасения; радуйтесь, вожди духовнии, многих души возводящи в небесная селения. Радуйтесь, мучеником единомравнии, яко мужески бравшиися со страстьми; радуйтесь, апостолом подражателие, просветивши тьму неверия боговедения светлостьми. Радуйтесь, пророком подобници, тайных и будущих проведением и проречением; радуйтесь, всем святым единоклестнии, подвигов ради и богоугождения. Радуйтесь, таинницы благодати и чудес совершителие предивнии; радуйтесь, граждане небеснии и друзи Богу и святым Его приснии.

Радуйтесь, преподобнии отцы наши Зосимо, Савватие и Германе.

Кондак 13

О преподобнии отцы наши, Зосимо, Савватие и Германе! Примите благоутробно от нас, смиренных и недостойных, сия возносимая вам хваления, и благоприятными вашими к Богу мольбами оградите ны от всякия беды и напасти, от недуга и глада, от огня и меча, и нашествия иноплеменных. Наипаче же сохраните ны вашим заступлением крепким от врагов невидимых, ищущих ны погубити, да избывше их многокозненных сетей, праведно и богоугодно проживем в нынешнем веце, и сподобимся в небесном

царствии купно с вами воспевати Христу Богу:
Аллилуия.

(Этот кондак читается трижды, затем икос 1-й и кондак 1-й)

Икос 1

Ангели воистину явистесь земнии и человецы небеснии житием вашим, преблаженнии отцы наши Зосимо, Савватие и Германе: во плоти бо, яко безплотнии, ангельское совершите жительство на земли, вся красоты мира и наслаждения временная яко уметы вменяюще, чистотою же и пощением выну к Богу приближающиеся. Емуже ныне достойно со безплотными предстояще, примите от любве нашея приносимая вам хваления сицевая:

Радуйтесь, единого Бога от всея души своей возлюбившии; радуйтесь, от юности Тому преподобием и правдою послужившии. Радуйтесь, возненавидевшии мира сего тленные красоты; радуйтесь, избежавшии мудре житейских соблазнов и суеты. Радуйтесь, к деланию заповедей Господних всею любовью прилепившиися; радуйтесь, мира сего и всякаго пристрастия к оному удалившиися. Радуйтесь, иноческое житие богоугождения ради себе предизбравшии; радуйтесь, тесный и прискорбный путь всею душею возлюбившии. Радуйтесь, мудрии взыскателие Христа, бисера вожделеннаго и драгаго; радуйтесь, люботруднии носителие Христова бремене, легкаго и благаго. Радуйтесь, Ангелом безплотным во плоти брэнней подражавшии; радуйтесь, на земли жительство небесное нам показавшии.

Радуйтесь, преподобнии отцы наши Зосимо, Савватие и Германе.

Кондак 1

Избраннии угодницы Господни и велицыи чудотворцы, светильницы Христовы Церкви пресветлии, облиставшии благочестия светлостьми пустыни Севернаго Помория, и всей стране Российстей сияющий выну чудес множеством, преподобнии отцы наши Зосимо, Савватие и Германе, яко имущии дерзновение ко Господу, благоприятными своими к Тому мольбами от всяких нас бед и зол сохраняйте, да радующеся зовем вам:

Радуйтесь, преподобнии отцы наши Зосимо, Савватие и Германе.

Молитва

О преподобнии и богоноснии отцы наши Зосимо, Савватие и Германе, земнии ангели и небеснии человецы, ближнии друзи Христовы и угодницы Божии, обители вашей славо и украшение, всея же северныя страны, паче и всего православнаго отечества нашего необоримая стено и великое заступление! Се мы, недостойнии и многогрешнии, с благоговейною любовью к ракам честных мощей ваших припадающе, духом сокрушенным и смиренным прилежно молим вас: молитесь непрестанно благосердаго Владыку и Господа нашего Иисуса Христа, яко дерзновение велие к Тому имущии, да не отступит от нас Его вседействующая благодать, покров же и заступление Пресвятыя

Владычицы нашея Богородицы на месте сем да пребудет, и да не оскудеют никогдаже истиннии ревнители ангельскаго жития во святей обители сей, идеже вы, богоноснии отцы и начальницы, безмерными труды и пощеньми, токи же слезными и всенощными бдении, непрестанными молитвами и моленьми начало иноческому житию положисте. Ей, угодницы святии, молитвенницы к Богу благоприятнейшии, теплыми вашими к Нему мольбами оградите и сохраните ны и святое селение сие ваше от труса, потопа, огня и меча, нашествия иноплеменных и смертоносныя язвы, от вражды и всяких нестроений, от всякия беды и скорби и от всякаго зла; да непрестанно на месте сем, в мире и безмолвии, благочестно славится Пресвятое имя Господа и Бога, и обретают вечное спасение ищущии Его. О преблаженнии отцы наши, Зосимо, Савватие и Германе! Услышите ны грешныя, во святей обители вашей и под кровом вашего защищения недостойно жительствующия, и благомощными вашими к Богу ходатайствы испросите душам нашим грехов оставление, жития исправление и вечных благ восприятие в небеснем царствии; всем же верующим, иже на всяком месте и во всякой нужде призывают вас в помощь и заступление, и иже с благоговейною любовью во обитель вашу притекают, не престаните изливати всякую благодать и милость, сохраняюще их от всякия сопротивныя силы, от всякия напасти и от всякаго злаго обстояния, и подающе им вся потребная к душевней и телесней пользе. Наипаче

же молитесь премилосердаго Бога, да утвердит и укрепит Церковь Свою святую и все наше православное отечество в мире и тишине, в любви и единomyслии, в правоверии и благочестии да сохранит и соблюдет во веки веков! Аминь.